


神農本草經疏

六


草部上品上

特別
173
4



本州經疏

六



門武
稀 173
卷 4



神農本草經疏卷之六

草部上品之上

總八十七種今疏其要者三十二種

黃精

菖蒲

甘菊花

人參

天門冬

甘草

乾地黃

朮

菟絲子

牛膝

芫薺子

萎蕤


芘柴胡

麥門冬

獨活附 羌活

本草經疏卷六

綠君亭



升麻

車前子

木香

薯蕷

今呼山藥

薏苡仁

澤瀉

遠志

草龍膽

細辛

石斛

巴戟天

菴藷子

卷柏

辟虺雷

藥王

草犀根

百草花

黃精味甘平無毒主補中益氣除風濕安五藏久服輕身延年不饑黃帝曰太陽之草名曰黃

精餌之可以長生

疏○黃精君純得土之冲氣而稟乎季春之令故味甘氣和性無毒其色正黃味厚氣薄土位乎中脾治中焦故補中脾土為後天生氣之源故益氣中氣強脾胃實則風濕之邪不能干故除風濕五臟之氣皆稟胃氣以生胃氣者即後天之氣也斯氣盛則五臟皆實實則安故安五臟臟安則氣血精三者益盛

氣滿則不饑久服輕身延年著其爲効之極
功也雖非治療之所急而爲養性之上藥故
仙經累贊其能服餌駐顏久而彌勝矣

主治參互

黃精同漆葉桑椹何首烏茅山朮作丸餌可
以變白久之殺三蟲能使足溫而不寒 同
朮久服可輕身涉險不饑 同地黃天門冬
釀酒可去風益血氣

簡誤

雷公云凡使勿用鈎吻真似黃精只是葉有
毛鈎子二箇是別認處若誤服害人黃精葉
似竹葉以溪水洗淨後蒸從巳至子竹刀薄
切爆乾用

菖蒲味辛溫無毒主風寒濕痺欬逆上氣開心
孔補五藏通九竅明耳目出音聲主耳聾癰瘡
溫腸胃止小便利四肢濕痺不得屈伸小兒溫

瘧身積熱不解可作浴湯久服輕身聰明耳目

不忘不迷惑延年益心智高志不老一十九節者良露根

者不可用忌節糖羊肉不可犯鐵令人吐逆

疏○菖蒲君正稟孟夏六陽之氣而合金之

辛味以生者也其味苦辛其氣大溫陽精芳

草故無毒陽氣開發外充百骸辛能四達以

散邪結此通利心脾二經之要藥也蓋苦可

燥濕溫能辟寒辛可散結風寒濕三者合而

成痺去此三邪痺自愈矣陽氣開發芬芳輕

揚氣重于味辛兼橫走故能下氣開心欬逆

者氣逆之候也下氣則欬逆上氣可去五臟

之壅遏既徹則九竅應之而通故聰明耳目

出音聲主耳聾辛以散之故治癰瘡氣味辛

溫氣厚發熱故溫腸胃膀胱虛寒則小便不

禁腸胃既溫則膀胱與焉故止小便脾主四

肢脾濕既祛則四肢濕痺不得屈伸自利山

嵐瘴氣最能使小兒發瘡寒濕之甚莫過山嵐既散其邪則病本已拔瘡焉得而不已焉作浴湯及久服輕身者除濕之驗也不迷惑益心智高志者心竅開利也其曰補五臟延年者單指巖棲脩煉之士辟穀服餌之用以其助發陽氣辟除陰嵐兼可參合養性諸藥如黃精青黏地黃天門冬之屬資其宣導臻乎太和故亦為仙經要藥至于世俗之人五

慾熾然六淫迭至詎可窮年卒歲久餌偏燥之物乎

主治參互

菖蒲同熟地黃黃蘗作丸治腎虛耳聾若中年預服可使老而聽聰 同二术木瓜薏仁石斛草薺黃蘗為除濕強步之要藥兼治下部膿窠濕瘡如神 佐人參麥門冬酸棗仁茯神遠志生熟地黃為補心之劑如心氣鬱

結者加沉香能益火以開心 兼辟蚤蟲

簡誤

雷公云凡使勿用泥菖夏菖其二件相似如竹根鞭形黑氣穢味腥不堪用凡使採石上生者根條嫩黃緊硬節稠一寸有九節者是真也採得後用銅刀刮去黃黑皮硬節一重了用嫩桑條相拌蒸出爆乾去桑條剉用

菊花味苦甘平無毒主風頭眩腫痛目欲脫淚

出皮膚死肌惡風濕痺療腰痛去來陶陶除胸中煩熱安腸胃利五脉調四肢久服利血氣輕身耐老延年

疏○菊花發生於春長養於夏秀英於秋而資味乎土歷三時之氣得天地之清獨稟金精專制風木故為去風之要藥苦可泄熱甘能益血甘可解毒平則兼辛故亦散結苦入心小腸甘入脾胃平幸走肝膽兼入肺與大

腸其主風頭眩腫痛目欲脫淚出皮膚死肌
惡風濕痺者諸風掉眩皆屬肝木風藥先入
肝肝開竅于目風爲陽邪勢必走上血虛則
熱熱則生風風火相搏故也腰痛去來陶陶
者乃血虛氣滯之候苦以泄滯結甘以益血
脉辛平以斂虛熱也其除胸中煩熱者心主
血虛則病煩陰虛則熱收于內故熱在胸中
血益則陰生陰生則煩止苦辛能泄熱故煩

熱並解安腸胃利五脉調四肢利血氣者卽
除熱祛風益血入心入脾入肝之驗也久服
輕身耐老延年者物久則力專力專則氣化
化則變常其釀酒延齡和藥變白皆服餌專
氣之功故亦爲仙經所錄矣生搗最治疔瘡
血線疔猶爲要藥疔者風火之毒也三六九
十二月採葉莖花根四物並陰乾百日等分
搗末酒調下錢許又可蜜丸如桐子大每七

九日三服皆酒吞一年變白二年齒生三年
返老仙人王子喬方也

主治參互

甘菊花祛風要藥風木通肝肝開竅于目故
爲明目之主同地黃黃檗枸杞子白蒺藜五
味子山茱萸當歸羚羊角羊肝治肝腎俱虛
目痛加決明子木賊草穀精草柴胡可以去
外翳 同黃連玄參甘草生地黃荆芥穗決

明子連翹桔梗柴胡川芎羌活童便可治風
熱目痛 君川芎細辛藁本當歸生熟地黃
天麥門冬白芍藥甘草童便治血虛頭痛亦
主頭眩暈因痰結而作者無痰藥不効 與
枸杞子相對蜜丸久服則終身無目疾兼不
中風及生疔疽 連根生用爲君加紫花地
丁益母草金銀花半枝連貝母連翹生地黃
括樓根白芷白及蒼耳子夏枯草可治疔瘡

甚者以蟾酥丸發汗大便閉者汗後以玉樞丹下之如無玉樞丹以大戟加蚤休棗肉丸服三錢必下矣忌甘草犯之則死爲大戟也人參味甘微寒微溫無毒主補五藏安精神定魂魄止驚悸除邪氣明目開心益智療腸胃中冷心腹鼓痛胸脇逆滿霍亂吐逆調中止消渴通血脉破堅積令人不忘久服輕身延年使
茯苓爲之

疏○人參得土中清陽之氣稟春升少陽之令而生故味甘微寒而無毒氣味均齊不厚不薄升多于降潔古謂其氣味俱薄浮而升陽中之陽也又曰陽中微陰蓋亦指其生長真元之氣而言歟神農微寒別錄微溫二義相蒙世鮮解者蓋微寒者春之寒也微溫者亦春之溫也神農直指所稟故曰微寒別錄兼言功用故又曰微溫旣云微矣寒不甚寒

則近于溫溫不甚溫則近于寒故知寒溫雖別言微則一也以言乎天則得其生生升發之氣以言乎地則得其清陽至和之精狀類人形上應瑤光故能回陽氣于垂絕却虛邪于俄頃功魁羣草力等九丹矣其主治也則補五臟蓋臟雖有五以言乎生氣之流通則一也益真氣則五臟皆補矣其曰安精神定魂魄止驚悸開心益智者以心藏神肝藏魂

肺藏魄腎藏精與志脾藏意與智故也心腎虛則精神不安矣肝肺虛則魂魄不定矣驚悸者心脾二經之病也心脾虛則驚悸心脾之氣強則心竅通利能思而智益深矣邪氣之所以久留而不去者無他真氣虛則不能敵故畱連而不解也茲得補而真元充實則邪自不能容譬諸君子當陽則小人自退清陽之氣下陷則耳目不聰明兼之目得血而

能視陽生則陰長故明目真氣內虛故腸胃
中冷氣旺陽回則不冷矣心腹鼓痛者心脾
虛故也二臟得補其痛自止所謂按之快然
者是也故經曰可按者虛也不可按者實也
不可按者勿用胸脇逆滿者氣不歸元也得
補則氣實而歸元也脾胃俱虛則物停滯而
邪客之故霍亂吐逆也補助脾胃之元氣則
二證自除調中者脾治中焦脾得補則中自
調矣消渴者津液不足之候也氣回則津液
生津液生則渴自止矣通血脉者血不自行
氣壯則行故通血脉破堅積者真氣不足則
不能健行而磨物日積月累遂成堅積譬夫
磨管納物無力則不轉不轉則停積矣脾主
消化真陽之氣回則脾強而能消何堅積之
不磨哉令人不忘者心主記脾主思心脾二
臟之精氣滿則能慮而不忘矣久服輕身延

年者純陽則充舉氣積則身輕五臟皆實延年可知矣斯皆敦本之論也

主治參序

人參補五臟陽氣之君藥開胃氣之神品
同大棗白芍藥龍眼肉甘草酸棗仁補脾陰
腎氣衰陽痿以之為君加鹿茸肉蓯蓉巴
戟天五味子麥門冬菟絲子山茱萸地黃枸杞
杜仲柏子仁乃扶衰之要劑兼令人有子

君藿香木瓜橘紅治胃虛弱嘔吐反胃如
妊娠嘔吐加竹茹枇杷葉 同白朮吳茱萸
治脾泄久不止 君五味子吳茱萸補骨脂
肉豆蔻治腎泄 同白芍藥炙甘草治血虛
腹痛鼓痛 同乾薑白朮炙甘草治中寒泄
瀉下利清穀甚則加肉桂附子 同附子乾
薑肉桂治寒厥指爪青黯便清踈臥 同附
子五味子治陽氣脫溫腸胃中冷 君五味

子麥門冬治肺虛氣喘夏月服之益氣除熱
 止消渴名生脉散 加白朮又治中暑傷氣
 倦怠 同沉水香白芍藥治真氣虛氣不歸
 元因而胸脇逆滿 同茯苓遠志益智棗仁
 麥門冬治精神恍惚魂魄不定驚悸 同沉
 水香茯神治心虛邪客之作痛 同鹿角膠
 杜仲續斷當歸地黃蘇木治負重努力內傷
 失血去蘇木加生地黃治胎漏不安 同黃

耆白芍藥五味子治汗多亾陽 同蘇木麥
 門冬治產後氣喘 在白虎湯治勞傷元氣
 人患熱病渴甚并頭疼 在敗毒散治氣虛
 人患四時不正傷寒 在參蘇飲治肺虛人
 傷風 同鱉甲青皮乾漆麤蟲肉桂牡蠣射
 干消瘧母 同甘菊花當歸地黃枸杞子蒺
 藜甘草柴胡則明目 同黃連紅麴白芍藥
 滑石末升麻治滯下腹痛赤色 同黃連烏

梅蓮肉升麻滑石末肉豆蔻治滯下久不止
 同白朮木瓜茯苓藿香炙甘草止虛煩躁
 同牛黃犀角天竺黃鈞籐鈎丹砂雄黃真
 珠茯神遠志治驚癇 同地黃阿膠麥門冬
 山茱萸五味子續斷杜仲治血崩加牛膝大
 薊鹿角膠治血淋 同橘皮紫蘇木瓜白朮
 竹茹治惡阻安胎熱多者去朮紫蘇加麥門
 冬 同五加皮白蘚皮石南葉石斛秦芫木

瓜薏苡仁草薺牛漆沉香菖蒲二朮治痺
 同黃檗黃耆白朮五味子麥門冬木瓜白芍
 藥薏苡仁白茯苓治痿 同附子白朮芍藥
 甘草茯苓治慢驚慢脾風 同白朮黃耆芍
 藥治自汗 同生薑皮各兩許水煎露一宿
 五更溫服治氣虛久瘧不止 同蘇木當歸
 童便治產後血暈 同石菖蒲蓮肉等分水
 煎治產後不語 同乳香丹砂鷄子白薑汁

三是調勻別用當歸兩許煎濃同吞治橫生
倒養難產神効 同附子肉桂麥門冬五味
子治房勞過度脫陽欲絕下部虛冷 同黃
耆天門冬五味子牛膝枸杞菖蒲治中風不
語

簡誤

人參論其功能之廣具如本經所說信非虛
語第其性亦有所不宜世之錄其長者或遺

其短摘其瑕者并棄其瑜是以或當用而後
時或非宜而妄設不蒙其利徒見其害二者
之誤其失則一遂使良藥不見信于世粗工
互騰其口說惜哉豈知人參本補五臟真陽
之氣者也若夫虛羸尪怯勞役饑飽所傷努
力失血以致陽氣短乏陷入陰分發熱倦怠
四肢無力或中熱傷暑暑傷氣無氣以動或
嘔吐泄瀉霍亂轉筋胃弱不能食脾虛不磨

食或真陽衰少腎氣乏絕陽道不舉完穀不
化下利清水中風失音產後氣喘小兒慢驚
吐瀉不止痘後氣虛潰瘍長肉等證投之靡
不立効惟不利于肺家有熱咳嗽吐血
衄血齒衄內熱骨蒸勞瘵陰虛火動之候蓋
肺者華蓋之臟也位乎上象天屬金喜清肅
而惡煩熱真氣無虧則寧謐清淨以受生氣
之熏蒸而朝百脉苟縱恣情慾虧損真陰火
空則發熱起于下炎燬乎上則肺先受之火
乃肺之賊邪邪氣勝則實實則肺熱鬱結爲
痰喉痒而發嗽血熱妄行溢上竅王好古
所謂肺熱還傷肺是已又有痧癘初發身雖
熱而斑點未形傷寒始作形證未定而邪熱
方熾若誤投之鮮克免者斯皆實實之害非
藥可解經曰實實虛虛損不足而益有餘如
是者醫殺之耳可不戒哉可不慎哉

天門冬味苦甘平大寒無毒主諸暴風濕偏痺
強骨髓殺三蟲去伏尸保定肺氣去寒熱養肌
膚益氣力利小便冷而能補久服輕身益氣延
年不饑忌鮮魚

疏○天門冬正稟大寒初之氣以生得地之
陰精獨厚味雖微苦甘而帶辛其氣大寒其
性無毒要以甘多者為勝味厚于氣陰也降
也除肺腎虛熱之要藥也其主諸暴風濕偏

痺殺三蟲去伏尸保定肺氣去寒熱者蓋以
熱則生風暴則屬火其言濕者乃濕熱之謂
苦以洩濕寒以除熱熱去則風止濕洩則痺
瘳偏痺者濕熱所致也強骨髓者腎為作強
之官而主骨濕熱不去下流客腎能使人骨
痿腎欲堅急食苦以堅之天門冬黃蘗之屬
是已且腎者水臟也平則溫而堅虛則熱而
軟味苦氣寒正入腎而除熱堅軟故強骨也

三蟲伏尸必生于脾腎俱虛內熱氣弱之人
苦能殺蟲辛能散結故殺三蟲而除伏尸也
肺爲華蓋之臟喜清肅而惡煩熱亦畏濕熱
平則安和發聲清亮一受火熱則爲賊邪所
干而痰壅欬逆氣喘吐血寒熱聲啞之證出
焉熱洩則痰散而肺清肺清則津液流通氣
得下降而諸證自止矣養肌膚益氣力利小
便者肺主皮毛脾氣散精上歸于肺通調水
道下輸膀胱又肺爲水之上源朝百脉而主
氣熱邪退則肺得所養故能養肌膚益氣力
利小便也冷而能補者熱盛則肺腎俱虛除
虛熱卽補肺腎也久服輕身益氣延年不饑
者熱退則水足水足則精固精固則腎氣益
實腎爲先天真氣之源腎實骨強延齡可知
已要之道書所錄皆指遺世獨立辟穀服餌
之流者設非謂恒人亦可望此也

主治參互

痰之標在脾胃與肺其本在腎若非腎家有
 火炎上薄肺煎熬津液而成黏膩則痰何自
 而生耶天門冬味苦氣大寒能清熱保肺下
 通于腎故同麥門冬百部桑白皮枇杷葉玄
 參貝母童便竹瀝為清肺消痰止嗽必用之
 藥 同地黃麥門冬五味子黃蘗車前子枸
 杞牛膝為丸補陰除熱滋腎家燥脾胃弱者

加山藥白茯苓砂仁以佐之 同麥門冬五
 味子熬膏入煉蜜益肺甚妙亦治消渴 同
 甘菊花釀酒除一切風能愈大風病水煮則
 除風熱兼除煩悶 同生地黃麥門冬白芍
 藥鼈甲牛膝杜仲續斷童便治吐血 同乾
 漆百部鼈甲青黛獺肝象膽殺三蟲而除勞
 瘵 同薏苡仁桑黃白及紫苑百部百合能
 除肺痿吐膿血 同青蒿鼈甲麥門冬銀柴

胡牛膝白芍藥地骨皮五味子能治婦人骨蒸
同麻子仁麥門冬生地黃童便能除大腸熱燥胃強者略加槌仁
同熟地黃胡麻仁和蜜久服駐顏不饑

簡誤

天門冬味苦平辛其氣大寒若因陰虛水涸火起下焦上炎于肺發為痰喘者誠哉要藥也然大寒而苦不利脾胃陰虛之人脾胃多

弱又以苦寒損其胃氣以致泄瀉惡食則危殆矣何者後天元氣生於胃氣五臟之氣皆因之以為盛衰者也強則喜食而甘味弱則惡食而不甘味陰虛精絕之病正賴脾胃之氣強能納能消以滋精氣若脾胃先困則是後天生氣之源絕矣丸餌雖佳總統於食湯液雖妙終屬於飲若非胃氣無損焉能納而消之以各歸其根奏平定之功哉必不得已

當以薏苡仁白茯苓山藥甘草白芍藥同用
或用麥門冬以代之可也誤用之必泄

甘草味甘平無毒主五藏六腑寒熱邪氣堅筋
骨長肌肉倍力金瘡癰解毒溫中下氣煩滿短
氣傷藏欬嗽止渴通經脈利氣血解百藥毒為
九土之精安和七十二種石一千二百種草久
服輕身延年二月八月除日採根暴乾十日成

木苦參為使反大戟芫花甘遂
海藻惡遠志忌猪肉令人陰痿

疏○甘草味甘氣平無毒正稟土中冲和之
陽氣以生故別錄稱之為九土之精可升可
降陰中陽也主五臟六腑寒熱邪氣堅筋骨
者以其得土中冲陽之氣味甘平性和緩故
能解一切毒氣安臟腑除邪熱也五臟之寒
熱邪氣既解則臟氣和而真氣生氣日以盛
故筋骨堅長肌肉倍力者甘能益脾脾主肌
肉兼主四肢脾強則四肢生力故長肌肉倍

力也主金瘡癰者甘入血分而能緩中且傷則熱熱而後癰甘溫益血而除熱煩熱解故癰散也溫中下氣者甘味屬土土位乎中故溫中甘能緩中散結故下氣煩滿短氣者是勞傷內乏陽氣不足故虛而煩滿短氣甘溫能益血除大熱助氣故煩滿短氣竝除也甘平且和和能理傷故治傷臟肺苦氣上逆嗽乃肺病甘以緩之故治咳嗽血不足則內熱

內熱則津液衰少而作渴甘能入脾益血故止渴血虛則經脈不通能益血則經脈自通矣甘能益血而溫氣分故利血氣其解一切金石草木蟲魚禽獸之毒者凡毒遇土則化甘草爲九土之精故能解諸毒也久服輕身延年者爲其益血安和五臟也

主治參互

諸毒遇土則化甘草爲土精故能化毒解一

切邪氣佐黃耆防風能運毒走表為痘疹氣
 血兩虛者首尾必資之劑 得白芍藥則補
 脾甲已化土故也 同人參黃耆白朮大棗
 當歸身麥門冬加升麻柴胡為補中益氣藥
 專理饑飽勞役內傷陽氣下陷發熱 同人
 參乾薑肉桂則溫中 同麥門冬蘇子枇杷
 葉則下氣 同黃連芍藥升麻滑石解熱毒
 滯下 同桔梗玄參鼠黏子括樓根清利咽

喉虛熱 同人參菖蒲益智龍眼肉遠志治
 健忘 同麥門冬石膏竹葉知母除煩悶躁
 渴頭疼解肌 同紫花地丁金銀花甘菊夏
 枯草益母草貝母白及白芷消一切疔腫
 同川黃連止小兒胎毒驚癇 同黃連木通
 赤芍藥生地黃瀉心經有餘之火 同預知
 子貫眾解一切蠱毒 單用水炙百偏煎熬
 劬許治懸癰如神 炙則補傷寒病瘥後血

虛

簡誤

甘能緩中故中滿者忌之嘔家忌甘酒家亦忌甘諸濕腫滿及脹滿病咸不宜服

乾地黃味甘苦寒無毒主折跌絕筋傷中逐血痺填骨髓長肌肉作湯除寒熱積聚除痺主男子五勞七傷女子傷中胞漏下血破惡血溺血利大小腸去胃中宿食飽力斷絕補五藏內傷

不足通血脉益氣力利耳目生者猶良 生地

黃大寒主婦人崩中血不止及產後血上薄心悶絕傷身胎動下血胎不落墮墜踠折瘀血留血鼻衄吐血皆擣飲之久服輕身不老 採得即
用者為

生曬乾收者為乾
以法製過者為熟

疏○乾地黃稟仲冬之氣以生黃者土之正色兼稟地之和氣故味甘氣寒而無毒別錄又云苦者以其兼入心脾也此乃補腎家之

要藥益陰血之上品本經主折跌絕筋傷中
逐血痺者肝藏血而主筋補肝則榮血調榮
血調則傷中自去痺者血分之病因虛而風
寒濕邪客之故筋拘攣而痛養血和肝痺必
瘳矣作湯除寒熱積聚除痺者血和則結散
故諸證自除也其曰填骨髓長肌肉主男子
五勞七傷者地黃爲至陰之藥正補腎水真
陰而益血血王則髓滿陰足則肌肉自長五

勞七傷皆陰虛內熱真陰不足之候甘寒能
除內熱而益精髓故勞傷自除也女子傷中
胞漏下血者陰虛則火熾而血熱火能銷物
造化自然之道也涼血益血則胞漏自止矣
下血者血熱也涼血則下血自愈榮血滯則
爲惡血生地黃能行血故破惡血溺血者腎
與小腸熱也益陰涼血則溺血自止二便自
利矣胃爲足陽明胃家濕熱盛則食不消生

地黃能瀉脾胃中濕熱濕熱去而脾胃安則
宿食自去飽而努力則腸胃筋脉有絕傷之
患形屬血故行血益血則諸傷自理矣五臟
咸屬陰陰卽精血補精血則五臟內傷不足
自愈矣通血脉益氣力利耳目者皆臟安之
驗也又主婦人崩中血不止及產後血土薄
心悶絕傷身胎動下血胎不落墮墜踈折瘀
血留血衄血吐血生者搗汁飲之皆涼血行
血之功也久服輕身不老則益陰填髓補五
臟之能事畢矣又按日華子云助心膽氣強
筋骨長志安魂定魄除驚悸者膽爲五臟六
腑之首行春升之氣故十一臟皆取決於膽
爲中正之官地黃入手足少陰亦入足厥陰
心與肝爲子母之臟膽爲肝之腑肝主筋腎
主骨腎藏精與志肝藏魂肺藏魄心膽二經
虛則病驚悸生地黃爲手少陰之要藥能涼

心助膽補肝心涼則熱不薄肺肝肺清寧則
魂魄自定膽氣壯則驚自除肝腎足則筋骨
自強心腎交濟則志自長矣

主治參互

生地黃同大小蘗各半俱搗取自然汁和童
便飲治一切血熱妄行吐血齒鼻衄神効
取汁和麵作餠飪冷淘治蟲心痛 同苧麻
根搗汁碗許加炒砂仁末三錢治胎動下血

同麥門冬治產後煩悶

同當歸赤芍藥

乳香沒藥肉桂炒黃荊子末治一切跌打折
傷瘀血作痛 同金銀花甘草荊芥穗玄參
連翹黃檗地榆白芷木通治血分濕熱生膿
瘡痛甚者濃煎恣飲立差 入瓊玉膏爲陰
陽兩補之要劑 乾地黃同沙苑蒺藜肉蓯
蓉鹿茸山茱萸五味子能益男子精 同人
參枸杞五味子麥門冬鹿茸車前子覆盆子

兔絲子多服令人有子 得青蒿子鼈甲銀

柴胡沙參天麥二冬黃檗甘草地骨皮牡丹

皮白芍藥牛膝能治骨蒸勞熱 同人參遠

志麥門冬酸棗仁栢子仁茯神甘草治心虛

驚悸怔忡健忘 同黃耆黃連黃檗酸棗仁

五味子白芍藥麥門冬龍眼肉牡蠣粉治盜

汗久不止 得麥門冬五味子牛膝枸杞子

車前子阿膠天門冬治溺血 同人參麥門

冬五味子牛膝漬酒能益氣力逐及奔馬

同當歸白芍藥川芎阿膠鹿角膠能益母安

胎 同砂仁治胎動下血腰痛 同青蒿地

骨皮麥門冬白芍藥山茱萸枇杷葉治婦人

月事先期 同生薑治產後中風 同當歸

川芎蒲黃黑豆炒炮薑澤蘭益母牛膝續斷

杜仲鹿角膠治一切產後血虛發熱 得肉

桂及乳香沒藥五靈脂治兒枕痛夏月去桂

同芍藥當歸川芎阿膠蘄艾香附治經事
 不調 同甘菊花女貞實枸杞子白蒺藜能
 明日益精 同黃連連翹薄荷甘草甘菊花
 木通治目暴赤痛 同鹿茸五味子人參人
 乳粉白茯苓能生齒 同何首烏桑椹甘菊
 鱧腸蜀椒能烏鬚髮

簡誤

生地黄黃性大寒凡產後惡食作瀉雖見發熱
 惡露作痛不可用誤用則泄不止胃氣者後
 天元氣之本也胃困則飲食不運精血不生
 虛熱何自而退故并當歸忌之凡見此證宜
 多加炮薑桂心人參必自愈凡陰虛咳嗽內
 熱骨蒸或吐血等候一見脾胃薄弱大便不
 實或天明腎泄產後泄瀉產後不食俱禁用
 生地黄當歸誤則同於前轍慎之凡胸膈多
 痰氣道不利升降窒塞藥宜通而不宜滯湯

液 中 禁 入 地 黃

木 味 苦 甘 溫 無 毒 主 風 寒 濕 痺 死 肌 瘰 疔 止 汗
除 熱 消 食 主 大 風 在 身 面 風 眩 頭 痛 目 淚 出 消
痰 水 逐 皮 間 風 水 結 腫 除 心 下 急 滿 及 霍 亂 吐
下 不 止 利 腰 臍 間 血 益 津 液 暖 胃 消 穀 嗜 食 作
煎 餌 久 服 輕 身 延 年 不 饑 茅 山 者 為 勝 忌 蛤
雀 桃 李 松 菜 青 魚
疏 ○ 木 稟 初 夏 之 氣 以 生 其 味 苦 其 氣 溫 從
火 化 也 正 得 土 之 冲 氣 故 別 錄 益 之 以 甘 表

土 德 也 故 無 毒 其 氣 芳 烈 其 味 甘 濃 其 性 純
陽 為 除 風 痺 之 上 藥 安 脾 胃 之 神 品 本 經 主
風 寒 濕 痺 死 肌 瘰 疔 者 正 以 風 寒 濕 三 者 合
而 成 痺 痺 者 拘 攣 而 痛 者 是 也 經 曰 地 之 濕
氣 感 則 害 人 皮 肉 筋 骨 死 肌 者 濕 毒 侵 肌 肉
也 瘰 疔 者 風 寒 乘 虛 客 於 肝 脾 腎 所 致 也 疸 者
脾 胃 虛 而 濕 熱 瘀 滯 也 如 上 諸 病 莫 不 由 風
寒 濕 而 成 木 有 除 此 三 邪 之 功 故 能 祛 其 所

致之疾也止汗除熱消食者濕熱盛則自汗
濕邪客則發熱濕去而脾胃燥燥則食自消
汗自止熱自除也又主大風在身面者木氣
芳烈而悍純陽之物也風爲陽邪發於陽部
故主之也風眩頭痛目淚出者陽虛則風客
之而眩痰厥則頭痛風熱壅則目淚出也消
痰水逐皮間風水結腫除心下急痛及霍亂
吐下不止者濕客於胃則滯而生痰客於脾

則生水脾虛濕勝則爲水腫濕客中焦則心
下急滿脾胃俱虛則中焦不治而濕邪客之
則爲霍亂吐下不止也利腰臍間血者血屬
陰濕爲陰邪下流客之使腰臍血滯而不得
通利濕去則諸證無不愈矣益津液煖胃消
穀嗜食者濕去則胃強而津液自生寒濕散
則胃自煖邪去而脾胃健則消穀而嗜食矣
煎餌久服輕身延年不饑者木爲陽藥故善

除陰濕濕去則脾胃之氣旺陽主氣氣盛則
身輕脾主四肢濕去則脾健健則四肢利故
能涉險負重也仙經云氣滿不思食是以延
年而不饑也

主治參互

朮為陽草氣勝黃精除濕祛寒疎風辟惡其
功能也單餌則延年輕身不饑兼濟則觀所
從何道故同人參茯苓芍藥甘草橘皮蓮

肉縮砂則健脾開胃消飲食如壯脾胃之要

劑調中之正法 同藿香橘皮茯苓人參木

瓜猪苓澤瀉縮砂則治霍亂吐瀉轉筋 同

乾葛防風茯苓炙甘草車前子猪苓澤瀉則

治濕勝作泄若雷奔 同秦艽草薢木瓜薏

苡仁桑寄生石斛黃耆地黃石菖蒲桂枝甘

草晚蠶沙則治一切痛痺及關節不利熱者

去桂枝加黃檗 得黃檗牛膝木瓜石斛能

健步潛行 得苦參牡蠣治小兒胃家濕熱
 飲食不生肌肉 若人參芍藥木瓜薏苡茯
 苓桑白皮赤小豆車前橘皮佐以猪苓澤瀉
 能治一切水腫日重則倍人參夜重則加地
 黃芍藥俱與朮倍 君枳實橘皮砂仁半夏
 人參則除心腹脹痛消宿食開胃去痰涎除
 傷食發寒熱及泄瀉 同人參橘紅白茯苓
 木瓜藿香治反胃吐逆因於寒則加生薑因

於熱則加竹茹枇杷葉逆水蘆根 君黃耆

生地黄佐以黃檗治一切腫瘡濕毒攻注足
 脛成瘡久不愈作丸餌良 倍茯苓脩事如
 經驗方能烏鬚駐顏 同麥門冬石斛黃檗
 白芍藥木瓜薏苡仁五味子為治痿要藥
 同生薑藿香檳榔能治山嵐瘴氣 同四物
 湯麥門冬荆芥防風地榆能治腸風下血
 同雄羊肝治雀盲 同補骨脂川椒茴香青

鹽川棟子黃檗治疝 同熟地桑椹脩事採
日精月華乾則蜜丸日三服可變白 爲末
和芝蔴研爛入水攪勻絞汁濾淨曝乾每三
錢空心酒服能滋脾腎

簡誤

木本經無分別陶弘景有赤白二種近世乃
有蒼白之分其用較殊要之俱爲陽草故祛
邪之功勝而益陰之効虧藥性偏長物無兼

力此天地生物自然之道也凡病屬陰虛血
少精不足內熱骨蒸口乾唇燥咳嗽吐痰吐
血鼻衄齒衄咽塞便秘滯下者法咸忌之木
燥腎而閉氣肝腎有動氣者勿服劉涓子癰
疽論云潰瘍忌白木以其燥腎而閉氣故反
生膿作痛也凡臟皆屬陰世人但知木能健
脾此蓋指脾爲正邪所干木能燥濕濕去則
脾健故曰補也寧知脾虛而無濕邪者用之

反致燥竭脾家津液是損脾陰也何補之足云此最易誤故特表而出之

菟絲子味辛甘平無毒主續絕傷補不足益氣力肥健汁去面黥養肌強陰堅筋骨主莖中寒精自出溺有餘瀝口苦燥渴寒血為積久服明目輕身延年得酒良宜丸不宜煮

疏○菟絲子君稟春末夏初之氣以生凝乎地之冲氣以成感秋之氣而實故本經言其

味辛平別錄益之以甘者正雷公所謂稟中和凝正陽之氣而結者也其為無毒明矣五味之中惟辛通四氣復兼四味經曰腎苦燥急食辛以潤之菟絲子之屬是也與辛香燥熱之辛迥乎不同矣學者不以辭害義可也為補脾腎肝三經要藥主續絕傷補不足益氣力肥健者三經俱實則絕傷續而不足補矣脾統血合肌肉而主四肢足陽明太陰之

氣盛則力長而肥健補脾故養肌益肝腎故
強陰堅筋骨煖而能補腎中陽氣故主莖中
寒精自出溺有餘瀝口苦燥渴者脾腎虛而
生內熱津液因之不足也二臟得補則二病
自愈寒血為積者勞傷則血瘀陽氣乏絕則
內寒血隨氣行氣弱不能統血以行久而為
積矣凡勞傷皆脾腎肝三臟主之肝脾氣王
則瘀血自行也久服明目輕身延年蓄胃得

血而能視肝開竅於目瞳子神光屬腎肝腎
實則目自明藏實精滿則身自輕延年可必

矣

主治參互

君蓮實山藥人參能實脾止泄嗜食加五味
子肉豆蔻砂仁能治腎泄 同五味子沙苑
蒺藜覆盆子蓮鬚山茱萸巴戟天車前子沒
食子枸杞子能益脾腎固精種子 同甘菊

花沙苑蒺藜甘枸杞子熟地黄羚羊角穀精
草決明子能明目 君术人參牛膝胡麻仁
治丈夫腰膝積冷痛或頑麻無力 單服偏
補人衛氣能助人筋脉 王好古云能補肝
臟虛故去風專主腰膝腰膝者肝腎之所治
也 苗生研塗面斑神効

簡誤

腎家多火強陽不痿者忌之大便燥結者亦

忌之

牛膝君味苦酸平無毒主寒濕痿痺四肢拘攣

膝痛不可屈伸逐血氣傷熱火爛墮胎療傷中

少氣男子陰消老人失溺補中續絕填骨髓除

腦中痛及腰脊痛婦人月水不通血結益精利

陰氣止髮白久服輕身耐老 忌牛肉牛乳

疏○牛膝君稟地中陽氣以生氣則兼乎木

火之化也故其味苦酸平無毒味厚氣薄走

而能補性善下行故入肝腎主寒濕痿痺四肢拘攣膝痛不可屈伸者肝脾腎虛則寒濕之邪客之而成痺及病四肢拘攣膝痛不可屈伸此藥既稟地中陽氣所生又兼木火之化其性走而下行其能逐寒濕而除痺也必矣蓋補肝則筋舒下行則理膝行血則痛止逐血氣猶云能通氣滯血凝也詳藥性氣當作痺傷熱火爛血焦枯之病也血行而活痛

自止矣入肝行血故墮胎傷中少氣男子陰消老人失溺者皆腎不足之候也腦爲髓之海腦不滿則空而痛腰乃腎之腑脊通髓於腦腎虛髓少則腰脊痛血虛而熱則髮白虛羸勞頓則傷絕肝藏血腎藏精峻補肝腎則血足而精滿諸證自瘳矣血行則月水自通血結自散久服輕身耐老悉如上說不復具疏

主治參互

君木仙茅木瓜石斛茯苓石南葉五加皮草
 薺生地黃黃耆芍藥虎骨沉香桂治諸痺
 同甘菊花石斛木瓜何首烏生地黃虎骨沉
 水香人參木黃耆天門冬麥門冬杜仲續斷
 芍藥橘皮黃檗桑寄生白蘚皮治一切痿痺
 四肢拘攣筋骨疼痛 君當歸地黃能下死
 胎加朴硝立下胞衣 君木瓜石斛草薺生

地黃黃檗五加皮骨碎補續斷金銀花白及
 芍藥甘草甘菊根紫花地丁茜草連翹治鶴
 膝風 根苗同用二三兩濃煎調鼈甲末三
 錢空心服治瘧在陰分久不瘥者三劑必已
 胃虛者加人參兩許橘皮去白五錢 君青
 蒿生地黃麥門冬甘枸杞子熬膏治婦人血
 虛發熱內熱口乾舌苦 治小便利莖中
 痛欲死兼治婦人血結腹堅痛鮮牛膝三四

兩白酒煎濃服之立愈 金瘡作痛生搗傅之立瘥

簡誤

誤用傷胎經閉未久疑似有娠者勿用上焦藥中勿入血崩不止者忌之

芫蔚子味辛甘微溫微寒無毒主明目益精除水氣療血逆大熱頭痛心煩久服輕身莖主癰瘰癧可作浴湯一名益母草 忌鐵

疏○芫蔚子稟地中之陽氣以生兼感乎上天春夏之氣而成亦陽草也味辛甘微溫微寒無毒入手足厥陰經為婦人胎產調經之要藥此藥補而能行辛散而兼潤者也目者肝之竅也益肝行血故明目益精其氣純陽辛走而不守故除水氣肝臟有火則血逆肝涼則降而順矣大熱頭痛心煩皆血虛而熱之候也清肝散熱和血則頭疼心煩俱解微

溫微寒說見人參條內

主治參互

午月五日采紫花益母草搗汁分貯瓷器內
各少許曬乾剔取和蜂蜜封固加人參琥珀
乳香沒藥血竭沉香丹砂五靈脂催生及胞
衣不下神効兼產後血暈瘀血薄心惡露不
行腹痛少腹兒枕痛調經治血閉經阻經行
作痛 單用和童便服能下死胎及治熱入

血室發熱煩躁類傷寒

君四物湯杜仲阿

膠真川續斷為丸安胎止痛 得生地黃白

芍藥麥門冬枇杷葉青蒿子五味子阿膠治

血熱經行先期及胎漏下血 同生甘菊蒼

耳草金銀花紫花地丁各一握貝母鼠黏子

白芷殭蠶白及白歛生甘草連翹生地黃各

三錢葵夏枯草汁和藥同煎濃頓飲之消一

切疔腫發背及無名腫毒

簡誤

益母草辛甘爲陽故性善行走能行血通經
血崩禁用瞳子散大禁用惟熱血欲貫瞳人
者與涼血藥同用則不忌

萎蕤味甘平無毒主中風暴熱不能動搖跌筋
結肉諸不足心腹結氣虛熱濕毒腰痛莖中寒
及目痛眦爛淚出久服去面黑黥好顏色潤澤
輕身不老

疏○萎蕤稟天地清和之氣而得稼穡之甘
故本經味甘平無毒主諸不足久服好顏色
潤澤輕身不老別錄又主心腹結氣虛熱腰
痛莖中寒目痛眦爛淚出甄權主內補不足
去虛勞客熱頭痛不安加而用之良日華子
謂其除煩悶止渴潤心肺補五勞七傷虛損
腰脚疼痛詳味諸家所主則知其性本醇良
氣味和緩譬諸盛德之人無往不利終始一

節故可長資其利用而不窮正如斯藥之能
補益五藏滋養氣血根本既治餘疾自除夫
血爲陰而主駐顏氣爲陽而主輕身陰精不
足則發虛熱腎氣不固則見骨疼及腰脚痛
虛而火炎則頭痛不安目痛眵爛淚出虛而
熱壅則煩悶消渴上盛下虛則莖中寒甚則
五勞七傷精髓日枯而成虛損之證矣以一
藥而所主多途爲効良夥非由滋益陰精增

長陽氣其能若是乎迹其所長殆亦黃精之
類歟其主中風暴熱不能動搖跌筋結肉濕
毒等證皆是女萎之用以本經二物混同一
條故耳或謂卽青黏理或有之純而不駁和
而不偏有益無損故無簡誤 晉彭城樊阿
少師事華陀陀授以漆葉青黏散服之利五
藏去蟲輕身益氣年至五百餘歲青黏生豐
沛彭城及朝歌一名地節一名黃芝主理五

藏益精氣本出於迷人入山見仙人服之以
告陀陀以為佳語阿阿秘之人見阿之壽而
氣力強盛問之因醉誤說人服多驗後無復
有人識青黏者或云即黃精之正葉者又云
即萎蕤 同黃精桑椹何首烏能駐顏

此胡君味苦平微寒無毒主心腹去腸胃中結
氣飲食積聚寒熱邪氣推陳致新除傷寒心下
煩熱諸痰熱結實胸中邪逆五藏間遊氣大腸
停積水脹及濕痺拘攣亦可作浴湯久服輕身

明目益精

半夏為之使

疏○柴胡稟仲春之氣以生兼得地之辛味
春氣生而升故味苦平微寒而無毒為少陽
經表藥主心腹腸胃中結氣飲食積聚寒熱
邪氣推陳致新除傷寒心下煩熱者足少陽
膽也膽為清淨之府無出入不可汗不可
吐不可下其經在半表半裏故法從和解小

柴胡湯之屬是也其性升而散屬陽故能達表散邪也邪結則心下煩熱邪散則煩熱自解陽氣下陷則爲飲食積聚陽升則清氣上行脾胃之氣行陽道則飲食積聚自消散矣諸痰熱結實胸中邪逆五臟間遊氣者少陽實熱之邪所生病也柴胡苦平而微寒能除熱散結而解表故能愈以上諸病大腸停積水脹及濕痺拘攣者柴胡爲風藥風能勝濕故也

主治參互

仲景小柴胡湯中同人參半夏黃芩治傷寒往來寒熱口苦耳聾胸脇痛無汗又治少陽經瘧往來寒熱亦治似瘧非瘧大便不實邪不在陽明者 在大柴胡湯治傷寒表裏俱急 傷寒百合證有柴胡百合湯 東垣治元氣勞傷精神倦怠用參耆白朮炙甘草當

歸佐以柴胡升麻引脾胃之氣行陽道名補
 中益氣湯 本方去當歸加茯苓猪苓澤瀉
 乾葛神麴名清暑益氣湯 同四物湯去當
 歸加澤蘭益母草青蒿能治熱入血室 同
 升麻乾葛等能升陽散火 同生地黃黃檗
 黃連甘草甘菊玄參連翹羌活荆芥穗治暴
 赤眼

簡誤

柴胡性升而發散病人虛而氣升者忌之嘔
 吐及陰虛火熾炎上者法所同忌瘧非少陽
 經者勿入治瘧必用柴胡其說誤甚不可久
 服亦無益精明目之理盡信書則不如無書
 此之謂也按今柴胡俗用有二種色白黃而
 大者為銀柴胡用以治勞熱骨蒸色微黑而
 細者用以解表發散本經並無二種之說功
 用亦無分別但云銀州者為最則知其優於

升散而非除虛熱之藥明矣衍義所載甚詳故并錄之

附衍義曰柴胡本經並無一字治勞今人方中鮮有不用者嗚呼凡此誤世甚多嘗原病勞有一種真藏虛損復受邪熱邪因虛而致勞故曰勞者牢也當須斟酌用之如經驗方中治勞熱青蒿煎之用柴胡正合宜耳服之無不効熱去即須急已若或無表熱得此愈

甚雖至死人亦不悟日擊甚多可不戒哉可不慎哉日華子又謂補五勞七傷藥性論亦謂治勞乏羸瘦若此等病苟無實熱醫者執而用之不歿何待注釋本草一字亦不可忽萬世之後所誤無窮耳

麥門冬君味甘平微寒無毒主心腹結氣傷中傷飽胃絡脉絕羸瘦短氣身重目黃心下支滿虛勞客熱口乾燥渴止嘔吐愈痿癭強陰益精

消穀調中保神定肺氣安五藏令人肥健美顏
色有子久服輕身不老不饑

疏○麥門冬在天則稟春陽生生之氣在地
則正感清和稼穡之甘本經甘平平者冲和
而淡也別錄微寒著春德矣入足陽明兼入
手少陰太陰實陽明之正藥主心腹結氣者
邪熱之氣結於心腹間也以其清和微寒而
平緩故能散熱結而下逆氣也傷中傷飽以

致胃絡脉絕者脾主肌肉五臟之氣皆稟於
胃胃病則脾無所稟故羸瘦而短氣也身重
目黃者脾胃濕熱也心下支滿者脾虛而濕
滯中焦也虛勞客熱口乾燥渴者因虛勞而
熱客中焦故口乾而燥渴陽明之熱上衝則
兼嘔吐也痿癭者陽明濕熱病也陽明濕熱
盛則上熏蒸於肺而爲痿癭治痿獨取陽明
治本之道也陰精生於五味五味先入脾胃

脾胃得所養則能散精於各臟而陰精充滿
 故能強陰益精也中焦者脾胃之所治也脾
 胃安則中焦治故能消穀而調中也保神定
 肺氣則兼潤乎心肺矣胃氣盛則五臟之氣
 皆有所稟而安脾胃俱實則能食而肥健脾
 統血心主血五臟之英華皆見於面血克臟
 安則華彩外發而顏色美矣脾胃強則後天
 之元氣日盛下氣則陽交於陰交則虛勞愈
 而內熱不生內熱去則陰精日盛故有子斷
 穀固著於仙經却乃已疾之良藥故久服延
 年輕身而不老不饑也

主治參互

同人參五味子為生脉散能復脉通心夏月
 暑傷氣服之良酒後飲之解酒毒肺熱者去
 人參加甘枸杞子作飲治一切虛勞客熱
 同五味子枸杞地黃牛膝鼈甲酸棗仁天冬

治五勞七傷胃強者可加當歸火盛者可入
 黃檗砂仁甘草三物俱遞減 治陽明瘧大
 渴引飲煩躁或嘔吐麥門冬石膏知母竹葉
 各數兩病人虛者加人參兩許痰多者加貝
 母橘紅各兩許 藥性論云麥門冬止煩渴
 主大水面目肢節浮腫下水治肺痿吐膿宜
 同天門冬薏苡仁黃檗芍藥茯苓石斛桑根
 白皮五味子牛膝煮飲彌佳 止泄精宜兼

覆盆蒺藜藜黃檗五味子 同茯苓車前黃連

石斛猪苓澤瀉療心腹結氣身重目黃 日
 華子治五勞七傷安魂定魄止渴肥人時疾
 熱狂頭痛止嗽故同石膏知母竹葉粳米專
 療持氣頭痛大渴煩躁及發狂甚者須各數
 兩濃煎頓飲乃佳虛羸人因作勞內傷而發
 者可量加人參名人參白虎湯有肺熱者勿
 入人參 崔元亮海上方同黃連治消渴

衍義治心肺虛熱虛勞客熱入沙參五味子
同青蒿鼈甲牛膝地黃芍藥天門冬枸杞
子五味子胡黃連山藥茯苓山茱萸蜜丸治
骨蒸勞熱

簡誤

麥門冬性寒雖主脾胃而虛寒泄瀉及痘瘡
虛寒作泄產後虛寒泄瀉者咸忌之

獨活味苦甘平微溫無毒主風寒所擊金瘡止

痛黃豚癩瘡女子疝瘕療諸賊風百節痛風無

久新者久服輕身耐老一名羌活

瘡作瘰

疏○獨活稟天地正陽之氣以生故味苦甘
平甄權潔古益之以辛微溫無毒氣味俱薄
浮而升陽也足少陰引經氣分之藥羌活性
溫辛苦氣厚於味浮而升陽也手足太陽行
經風藥竝入足厥陰少陰經氣分羌活氣雄
獨活氣細故雄者治足太陽風濕相搏頭痛

肢節痛一身盡痛者非此不能除乃却亂反
正之主若藥也細者治足少陰傷風頭痛兩
足濕痺不能行動非此不能除而不治太陽
之證名列若部之中非比柔懦之主小無不
入大無不通故能散肌表八風之邪利周身
百節之痛其主風寒所擊金瘡止痛者金瘡
爲風寒之所襲擊則血氣壅而不行故其痛
愈甚獨活之苦甘辛溫能辟風寒邪散則肌

表安和氣血流通故其痛自止也貴豚者腎
之積腎經爲風寒乘虛客之則成貴豚此藥
本入足少陰故治貴豚癩與瘡皆風邪之所
成也風去則癩瘡自愈矣女子疝瘕者寒濕
乘虛中腎家所致也苦能燥濕溫能辟寒辛
能發散寒濕去而腎臟安故主女子疝瘕及
療諸賊風百節痛風無久新也輕身耐老定
非攻邪發散之藥所能烏可久服哉本經載

之誤矣二藥本一種第質有虛實老嫩氣有厚薄之不同耳

主治參互

君麻黃甘草主冬月即病傷寒太陽經頭疼發汗解表 君麥門冬前胡黃芩佐以甘草治春時瘟疫邪在太陽頭痛 人葛根湯治太陽陽明頭痛兼遍身骨痛口渴煩熱不得眠若渴甚煩熱甚頭痛甚則加石膏知母竹

葉各兩許 瘧發太陽經頭痛者於治瘧藥

中加之痛止則去之 同白朮蒼朮秦艽生

地黃薏苡仁木瓜石斛黃蘗治下部一切風

濕濕熱 同生地黃赤芍藥生甘草牡丹皮

石膏等水煎治風熱上攻牙腫痛 同萊菔

子炒香只取羗活為末每服二錢溫酒調下

一日一服二日二服三日三服治妊娠浮腫

由於風濕出許學士本事方 人睛忽垂至

鼻如黑角塞痛不可忍或時時大便血出痛
名曰肝脹羌活一味煎汁服數盞自愈出夏
子益奇疾方

簡誤

獨活羌活陽草中之風藥也本為祛風散寒
除濕之要品風能勝濕以其性燥故也本經
別錄並載主中風及諸風不知真中風惟西
北邊塞高寒之地風氣剛猛虛人當之往往

猝中或口眼歪邪或口噤不語或手足癱瘓
左右不仁或剛瘓柔瘓即角弓反張此藥與
諸風藥並用可也若夫江南吳楚越閩百粵
鬼方梁州之域從無剛勁之風多有濕熱之
患質脆氣虛多熱多痰其患中風如前等病
外證雖一一相似而其中實非何者此皆劉
河間所謂將息失宜水不制火丹溪所謂中
濕中痰中氣是也此則病係氣血兩虛虛則

內熱煎熬津液結而為痰熱則生風故致猝
 倒亦如真中風狀而求其治療之方迥若天
 淵外邪之氣勝則實實則瀉之祛風是已內
 而真氣不足則虛虛則補之調氣補血生津
 清熱是已倘誤用風藥反致燥竭其津液血
 愈不足而病愈沉困命曰虛虛攻補既謬歿
 生遂殊粗工懵昧執迷不悟茲特表而明之
 又有血虛頭痛及遍身疼痛骨痛因而帶寒
 熱者此屬內證誤用反致作劇

升麻味甘苦平微寒無毒主解百毒殺百精老
 物殃鬼辟瘟疫瘴氣邪氣蠱毒入口皆吐出中
 惡腹痛時氣毒癘頭痛寒熱風腫諸毒喉痛口
 瘡久服不天輕身長年

疏○升麻稟天地清陽之氣以生陽草也故
 味甘苦平微寒無毒潔古又云性溫味辛微
 苦氣味俱薄浮而升陽也為足陽明太陰引

經的藥得葱白白芷緩帶脉之縱急亦入手
陽明大腸升陽氣於至陰之下春氣生生而
上升升麻正得之故主解百毒感清陽之氣
者必能破幽暗故殺百精老物殃鬼辟瘟疫
瘴氣邪氣蠱毒入口皆吐出凡云甘者其氣
必和升則必散和而散故主中惡腹痛時氣
毒癘頭痛寒熱風腫諸毒喉痛口瘡者手少
陽足陽明太陰熱極故也散三經之火則二
證愈矣末載久服不天輕身長年此豈發散
之藥所能哉無是理也

主治參互

升麻葛根湯散足陽明之熱邪發手太陰陽
明之斑痧及天行豌豆瘡水煎綿沾拭之
引葱白散手陽明風邪引石膏止陽明經齒
痛或加生地黃麥門冬知母牡丹皮黃檗連
翹玄參彌良 醋炒綠色升麻君蓮肉人參

治噤口痢有神 同石膏知母麥門冬竹葉

治陽明熱極發斑頭疼口渴 佐參耆引清

陽之氣上升行陽道故補脾胃藥中不可闕

人升陽散火湯治陽氣鬱遏及元氣不足

陽氣下陷 同荆芥防風黃芩甘草白芷能

去皮膚風邪 同葛根荆芥菊花甘草解肌

肉間風熱兼發浮汗 同葛根連翹玄參甘

草生地黃麥門冬治牙根浮爛惡臭 為小

兒斑癩及天行瘡子家聖藥天行瘡子即痘

也未見點時可用見標之後不可用 同鬱

金服治蠱毒不吐則下 同射干水煎服治

射工溪毒并以滓塗之 同生地黃麥門冬

牛膝蒲黃水煎治小兒尿血 佐黃連紅麴

滑石白芍藥蓮肉甘草為治一切滯下要藥

簡誤

升麻屬陽而性升其功用具如經說凡吐血

鼻衄咳嗽多痰陰虛火動腎經不足及氣逆嘔吐驚悸怔忡癲狂等病法咸忌之誤用多致危殆

車前子味甘鹹寒無毒主氣癢止痛利水道小便除濕痺男子傷中女子淋瀝不欲食養肺強陰益精令人有子明目療赤痛久服輕身耐老葉及根味甘寒主金瘡止血衄鼻瘀血血痕下血小便赤止煩下氣除小蟲

疏○車前子稟土之冲氣兼天之冬氣以生故味甘寒而無毒別錄兼鹹故走水道其主氣癢止痛通腎氣也小便利則濕去濕去則痺除傷中者必內起煩熱甘寒而潤下則煩熱解故主傷中女子淋瀝不欲食是脾腎交病也濕去則脾健而思食氣通則淋瀝自止水利則無胃家濕熱之氣上熏而肺得所養矣男女陰中俱有二竅一竅通精一竅通水

命門真陽之火即係先天之元氣道家謂之君火後天之精氣亦與之合而繫焉膀胱者濕熱濁陰之水滲出下竅為小便道家謂之民火是也二竅不竝開故水竅常開則小便利而濕熱外洩不致鼓動真陽之火則精竅常閉而無漏洩久久則真火寧謐而精用益固精固則陰強精盛則生子腎氣固即是水臟足故明目及療赤痛輕身耐老即強陰益

精之驗肝腎膀胱二經之要藥也○葉及根味甘寒金瘡必發熱熱則痛極甘寒能涼血除熱故主金瘡血熱則妄行溢出上竅故主吐衄及尿血便赤止煩下氣○明醫雜錄云根葉治鼻衄尿血熱痢搗汁飲之子主氣瘰利水道療肝中有風熱衝目若人服固精藥久服此一泄即有子

主治參互

同沐通沉香橘皮升麻治氣癰 同二木宜

木瓜石斛川草薜茯苓五加皮治濕痺 獨

用為末米飲下二錢七治暴瀉神効 君白

芍藥白茯苓白菹豆炙甘草治水泄 同生

地黃牛膝天門冬麥門冬黃檗五味子甘枸

杞子人參白膠治尿血及婦人血淋 入十

子衍宗丸為生精種子要藥 入金匱腎氣

丸則固精益陰 獨用炒為末專治濕勝水

瀉 同五味子覆盆子蓮子蓮鬚山茱萸肉

沒食子沙苑蒺藜人參麥門冬牛膝白膠魚

膠能強陰固精種子 同生地黃甘菊花決

明子玄參蜜蒙花連翹黃連柴胡生甘草治

暴赤目症

簡誤

車前子性走下竅雖有強陰益精之功若遇

內傷勞倦陽氣下陷之病皆不當用腎氣虛

脫者忌與淡滲藥同用

木香味辛溫無毒主邪氣辟毒疫溫鬼強志主
淋漓療氣劣肌中偏寒主氣不足消毒殺鬼精
物溫瘧蠱毒行藥之精久服不夢寤寤寐輕身
致神仙

疏○青木香味辛溫無毒是稟夏秋之陽氣
以生兼得土之陽精故無毒性屬純陽故主
邪氣辟毒疫溫鬼陽主清明開發故強志及
不夢寤寤寐行藥之精皆陽盛氣烈之功也

主治參互

同延胡索治一切女人血氣刺心痛不可忍
同牽牛雷丸檳榔殺一切蟲 佐黃連芍
藥治一切滯下惟身熱作嘔逆口渴者勿用
同橘皮砂仁白豆蔻紫蘇葉調一切氣不
通順及冷氣攻痛作泄大怒後氣逆胸膈脹
滿兩脇作痛

簡誤

詳其治療與今白木香當是兩種按圖經謂
 生永昌又云今惟廣州舶上有來者一云出
 大秦國一云產崑崙則所出地土各異是名
 同而實異可知已藥性論云當以崑崙來者
 為勝此絕不可得又云西胡來者劣今市肆
 所有正白木香也其味辛其氣溫專主諸氣
 不順求其能辟毒疫溫鬼殺鬼精物恐或未

然也肺虛有熱者慎毋犯之元氣虛脫及陰

虛內熱諸病有熱心痛屬火者禁用傷寒類
 要所載治天行熱病若發赤豆斑用青木香
 水煮服者蓋指崑崙來者一種定非坊間所
 市廣州舶上世所常用之白木香也

薯蕷味甘溫平無毒主傷中補虛羸除寒熱邪
 氣補中益氣力長肌肉主頭面遊風頭風眼眩
 下氣止腰痛補虛勞羸瘦充五藏除煩熱強陰

久服耳目聰明輕身不饑延年

疏○薯蕷得土之冲氣兼稟春之和氣以生
故味甘溫平無毒觀其生搗敷癰瘡能消熱
腫是微寒之驗也甘能補脾脾統血而主肌
肉甘溫能益血脾治中焦故主傷中補虛羸
補中益氣力長肌肉充五藏除煩熱強陰也
其主寒熱邪氣及頭面遊風頭風眼眩下氣
止腰痛者正以其甘能除大熱甘能益陰氣

甘能緩中甘溫平能補肝腎藥性論云薯蕷
臣能補五勞七傷去冷是也蓋寒熱邪氣者
陰不足則內熱內虛則外邪客之熱則生風
緩則下氣下氣則陽交於陰五勞既去五藏
既充則久服耳目聰明輕身延年之効自著
矣

主治參互

同地黃枸杞牛膝甘菊花白茯苓五味子則

補肝腎益陰氣治一切虛羸強陰長肌增力
明目 同蓮肉白藕豈人參白芍藥茯苓炙
甘草橘皮則補脾健胃止泄瀉加木瓜藿香
安吐逆 同羊肉肉苁蓉作羹可扶衰補虛
羸

簡誤

諸蕒薯蕷確係兩種譬諸米穀其種有粳糯
秬黍稷之不同是也入藥必以冀州所產者

為勝總之南方不迨北地圖經并載入四明
則誤矣不宜與麩同食

薏苡仁味甘微寒無毒主筋急拘攣不可屈伸
風濕痺下氣除筋骨邪氣不仁利腸胃消水腫
令人能食久服輕身益氣

疏○薏苡仁正得地之燥氣兼稟乎天之秋
氣以生故味甘淡微寒無毒陽中陰降也經
曰地之濕氣感則害人皮肉筋脉又曰風寒

濕三者合而成痺此藥性燥能除濕味甘能入脾補脾兼淡能滲泄故主筋急拘攣不可屈伸及風濕痺除筋骨邪氣不仁利腸胃消水腫令人能食久服輕身總之濕邪去則脾胃安脾胃安則中焦治中焦治則能榮養乎四肢而通利乎血脉也甘以益脾燥以除濕脾實則腫消脾強則能食濕去則身輕如是則已上諸疾不求其愈而自愈矣

主治參互

同木瓜石斛草薺黃檗生地黃麥門冬治痿厥 同五加皮牛膝石斛生地黃甘草主筋拘急加二朮菖蒲甘菊花可治痺佐以附子能治胸痺偏緩 獨用數兩淘淨煮濃湯頓飲可治肺經因濕火所傷吐膿血一切肺痿肺癰咳嗽涕唾上氣經曰治痿獨取陽明陽明者胃與大腸也二經濕熱盛則成痿熏蒸

於肺則發肺癰及吐血咳嗽涕唾穢濁蓋肺與大腸為表裏腑熱必傳於臟大腸與胃家之濕熱散則痿自愈吐膿血咳嗽亦竝止矣

簡誤

薏苡乃除濕燥脾胃之藥凡病人大便秘小水短少因寒轉筋脾虛無濕者忌之妊娠禁用

澤瀉味甘鹹寒無毒主風寒濕痺乳難消水養五藏益氣力肥健補虛損五勞除五藏痞滿起陰氣止洩精消渴淋瀝遂膀胱三焦停水久服耳目聰明不饑延年輕身面生光能行水上扁鵲云多服病人眼

疏○澤瀉稟地之燥氣天之冬氣以生故味甘寒別錄益之以鹹腎與膀胱為表裏鹹能入腎甘能入脾寒能去熱蓋淡滲利竅之藥也其曰主風寒溼痺乳難消水養五臟皆以

利水燥溼則脾得所養脾得所養則五臟皆得所養益氣力肥健者皆水利則溼去溼去則脾強之功效也又云主腹痞滿淋瀝逐膀胱三焦停水其能利水祛溼益無疑矣洩精者溼熱下流客腎與膀胱是民火扇君火也故精搖而洩病在脾胃溼熱盡則洩精自止矣止消渴者單指溼熱侵脾脾為邪所干則不能致津液也總之其性利水除溼則因溼熱所生之病靡不除矣

主治參互

水腫晝劇夜平者陽水也澤瀉同猪苓白茯苓人參白朮白芍藥赤小豆桑白皮橘皮治之多服必愈夜劇晝平者陰水也同車前子赤茯苓生地黃白芍藥赤小豆桑根白皮木瓜石斛薏苡仁治之多服必愈 入五苓散四苓散治一切溼熱 入六味地黃丸除陰

虛病有溼熱者 同人參白朮半夏茯苓橘
 皮紫蘇猪苓為治飲之要藥一切停飲停水
 無不効 仲景治心下支飲澤瀉五兩朮二
 兩水二升煎取半升分溫再服 素問身熱
 解墮汗出如浴惡風少氣名曰酒風服之以
 澤瀉朮各十分糜銜五分合以二指撮食後
 服之 飲證病甚欲眩者用澤瀉五兩炒朮
 二兩水三升煮濃服必効 仲景治水搖渴

煩小便不利或吐或瀉五苓散主之

簡誤

澤瀉本經及藥性論日華子皆曰補虛損五
 勞久服耳目聰明不饑延年及仙經斷穀腎
 虛精自出補女人血海令人有子等條則悖
 謬之談文不屬理非神農氏之言明矣扁鵲
 云多服病人眼乃為確論也澤瀉善逐水病
 人無溼無飲而陰虛及腎氣乏絕陽衰精自

流出腎氣不固精滑目痛虛寒作泄等候法
咸禁用誤犯令人虛極

遠志

君

味苦溫無毒主欬逆傷中補不足除邪

氣利九竅益智慧耳目聰明不忘強志倍力利

丈夫定心氣止驚悸益精去心下膈氣皮膚中

熱面目黃久服輕身不老好顏色延年

莖名小草主益

精補陰氣止虛損夢洩

疏○遠志感天之陽氣得地之芳烈而生故

無毒亦陽草也其菖蒲之流乎其味苦溫兼

微辛為手少陰經君藥兼入足太陰經苦能

洩熱溫能壯氣辛能散鬱故主欬逆傷中補

不足養性全神明故除邪氣陽主發散故利

九竅心氣開通則智慧自益經曰心為君主

之官神明出焉天君既定五官自明故耳目

聰明不忘強志陽氣盛則力增長男子屬陽

故利丈夫定心氣止驚悸者心臟得補而實

故心氣定而驚悸止也心火不妄動則陽不
妄舉精不搖矣故益精心下膈氣是心氣鬱
而不舒也皮膚中熱面目黃者溼熱在上部
也苦以洩之溫以暢之辛以散之則二證自
去矣久服輕身不老好顏色延年者心主血
心氣足則血色華於面君主強明則十一官
皆得職故延年不老陽氣日積故身輕也人
之心腎晝夜必交心家氣血旺盛則腎亦因

之而實腎藏精與志腎實故志強也 莖名

小草性味略同功用相近故亦主益精補陰
氣止虛損夢洩

主治參互

同茯神人參地黃酸棗仁丹砂為鎮心定驚
要藥 同人參白芍藥酸棗仁茯神炙甘草
天竺黃釣藤鈎治兒心虛易驚加白檀香治
一切驚及慢驚 同茯神天竺黃釣藤鈎丹

砂金箔真珠琥珀胆星犀角治小兒急驚
 同人參栢子仁酸棗仁麥門冬五味子當歸
 身茯神茯苓益智仁生地黃甘草沉香治心
 氣弱心血少餒怯易驚夢寐多魘神不守舍
 怔忡健忘失志陽痿 同茯神人參白朮龍
 眼酸棗仁木香炙甘草能歸脾益智 入當
 歸六黃湯能止陰虛盜汗 加甘草治婦人
 血噤失音小兒客忤 古今錄驗及范汪方

治胸痺心痛逆氣膈中飲不下小草丸小草
 桂心蜀椒去日乾薑細辛各三兩附子二分
 炮去皮臍共為末蜜丸如梧子大先食米汁
 下三丸日三不知稍增以知為度禁猪肉冷
 水生葱菜 遠志一味煎酒治一切癰疽發
 背病從七情憂鬱惱怒而得者服之皆愈
 陳言三因方用遠志酒治一切癰疽發背惡
 候浸大有效血陰毒在中則不痛傳之即痛

有憂怒等氣積怒攻則痛不可忍傳之即不
痛或蘊熱在內熱逼人手不可近傳之即清
涼或氣虛冷潰而不斂傳之即斂此本韓大
夫宅用以救人方極驗若七情內鬱不問虛
實寒熱治之皆愈用遠志不拘冬寡米泔浸
洗槌去心為末每服三錢溫酒一盞調澄少
頃飲其清以滓敷患處

簡誤

心經有實火為心家實熱應用黃連生地黃
者禁與參朮等補陽氣藥同用

龍膽味苦澁大寒無毒主骨間寒熱驚癇邪氣
續絕傷定五藏殺蠱毒除胃中伏熱時氣溫熱
熱洩下痢去腸中小蟲益肝膽氣止驚惕久服
益智不忘輕身耐老

疏○草龍膽稟天地純陰之氣以生故其味
大苦澁其性大寒而無毒足厥陰足少陰足

陽明三經藥入足少陰除本經之熱腎主骨
故主骨間寒熱熱極生風則發驚搐重則變
為癇病溼熱邪氣之在中下二焦者非此不
去熱去則諸證自解五臟有熱則不安熱除
則五臟自定苦澁而寒故殺蠱毒大苦大寒
故能滌除胃中所伏實熱及時氣溫熱熱洩
下痢去腸中小蟲熱清則肝膽之氣亦清故
益肝膽氣而止驚惕也久服益智不忘輕身

耐老則非其任矣

主治參互

草龍膽同白芍藥甘草茯神麥門冬木通主
小兒驚癇入心壯熱骨熱時疾熱黃口瘡
同苦參牛膽治穀疸 同苦參蛆蟲灰青黛
治小兒一切疳熱狂語及瘡疥 治虻蟲攻
心如刺吐清水龍膽二兩去頭剉水二盞煎
取一盞去滓隔宿勿進食平旦時一頓服之

即差 同生地黃等分治溼熱傷血分浸大腸以致卒下血多服必効

簡誤

草龍膽味既大苦性復大寒純陰之藥也雖能除實熱胃虛血少之人不可輕試凡病脾胃兩虛因而作泄者忌之凡病虛而有熱者勿用亦勿空腹服餌之令人溺不禁以其太苦則下泄太甚故也炮炙論以銅刀切去鬚

土頭剉碎甘草汁中浸一宿漉出曝乾用

細辛味辛溫無毒主欬逆頭痛腦動百節拘攣風溼痺痛死肌溫中下氣破痰利水道開胸中除喉痺齟鼻風癩疾下乳結汗不出血不行安五藏益肝膽通精氣久服明目利九竅輕身長年

疏○細辛稟天地陽升之氣以生故其味辛溫而無毒入手少陰太陽經風藥也風性升

升則上行辛則橫走溫則發散故主欬逆頭
痛腦動百節拘攣風溼痺痛死肌蓋痺及死
肌皆是感地之溼氣或兼風寒所成風能除
溼溫能散寒辛能開竅故療如上諸風寒溼
疾也別錄又謂溫中下氣破痰開胸中除喉
痺齩鼻下乳結汗不出血不行益肝膽通精
氣皆升發辛散開通諸竅之功也其曰久服
明目利九竅輕身長年者必無是理蓋辛散
升發之藥其可久服哉

主治參互

同石膏能治陽明火熱上攻以致齒痛 得
當歸芍藥芎藭牡丹藁本甘草白薇通治婦
人子宮冷不受孕 得鯉魚膽青羊肝甘菊
花決明子療目痛 得甘草療傷寒少陰咽
痛 得藁本芎藭白芷荆芥防風治風頭痛
得紫蘇防風甘草桔梗杏仁薄荷桑白皮

能解利傷風寒鼻塞

簡誤

細辛風藥也其性升燥發散故凡病內熱及
火升炎上上盛下虛氣虛有汗血虛頭痛陰
虛咳嗽法皆禁用即入風藥亦不可過五分
以其氣味俱厚而性過烈耳

石斛味甘平無毒主傷中除痺下氣補五藏虛
勞羸瘦強陰益精補內絕不足平胃氣長肌肉

逐皮膚邪熱沸氣脚膝疼冷痺弱久服厚腸胃
輕身延年定志除驚

疏○石斛稟土中冲陽之氣兼感春之和氣
以生故其味甘平而無毒氣薄味厚陽中陰
也入足陽明足少陰亦入手少陰甘能除熱
甘能助脾甘能益血平能下氣味厚則能益
陰氣故主傷中下氣補五藏虛勞羸瘦強陰
益精補內絕不足平胃氣長肌肉久服厚腸

胃輕身延年定志除驚者以其入胃入腎入
心脾補益四經則四經所生病皆得治療蓋
皆益脾益胃益腎益心之功力也又主除痺
逐風邪熱拂氣脚膝疼冷痺弱者兼能除
脾胃二經之溼故也

主治參互

同麥門冬白茯苓橘皮甘草則益胃強四肢
同麥門冬五味子人參炙甘草白芍藥枸

杞牛膝杜仲則理傷中補五藏虛勞羸瘦強
陰益精 同枇杷葉麥門冬橘皮則下氣
得木瓜牛膝桑白皮石南葉白蘚皮黃檗茯
苓菖蒲則主諸痺及逐皮膚邪熱拂氣冷痺
弱 夏月一味酒蒸泡湯代茶頓健足力

簡誤

宜入湯酒不宜入丸其味不苦而帶甘其形
長而細中堅實者良酒洗蒸晒乾用慎毋誤

用木斛味大苦餌之損人亦不入上焦藥
 巴戟天味辛甘微溫無毒主大風邪氣陰痿不
 起強筋骨安五藏補中增志益氣療頭面遊風
 少腹及陰中相引通下氣補五勞益精利男子
 疏○巴戟天稟土德真陽之精氣兼得天之
 陽和陽主發散散則橫行是當木之令而兼
 金之用也故其味辛別錄益之以甘而本經
 又曰微溫無毒宜其然也其主大風邪氣及

頭面遊風者風為陽邪勢多走上經曰邪之
 所奏其氣必虛巴戟天性能補助元陽而兼
 散邪况真元得補邪安所留此所以愈大風
 邪氣也主陰痿不起強筋骨安五臟補中增
 志益氣者是脾腎二經得所養而諸虛自愈
 矣其能療少腹及陰中引痛下氣并補五勞
 益精利男子者五藏之勞腎為之主下氣則
 火降火降則水升陰陽互宅精神內守故主

腎氣滋長元陽益盛諸虛為病者不求其退而退矣

主治參互

得黃檗橘核荔枝核牛膝川萆薢木瓜金零子懷生地黃治疝氣因于腎虛 得五味子肉蓯蓉鹿茸山茱萸栢子仁補骨脂枸杞子治陰痿去鹿茸肉蓯蓉加黃檗牛膝麥門冬生地黃車前子治陰虛白濁久不愈 得鹿

角栢子仁天門冬遠志蓮鬚覆盆黃檗治夜夢鬼交泄精 同甘菊花石菖蒲何首烏刺蒺藜黑豆山茱萸天門冬治頭面上風 得熟大黃治飲酒人脚弱

簡誤

巴戟天性溫屬陽故凡病相火熾盛思慾不得便赤口苦目昏目痛煩躁口渴大便燥閉法咸忌之

菴藺子味苦微寒微溫無毒主五藏瘀血腹中
水氣臏脹留熱風寒溼痺身體諸痛療心下堅
膈中寒熱周痺婦人月水不通消食明目久服
輕身延年不老

疏○菴藺子得土之烈氣而微感天之陰氣
味厚氣薄故味苦微寒微溫無毒察其功用
必應兼辛藥性論加辛是也何者苦以洩下
溫以開通使非兼辛胡能主五藏瘀血及腹

中水氣臏脹留熱風寒溼痺身體諸痛療心
下堅膈中寒熱周痺婦人月水不通消食明
目耶正以其散中有補補而能行故列上經
也

主治參互

同牛膝茜草白及消腹癰去留血又主瘀血
腹脹俗呼為單腹脹四肢不腫者是其候也
善辟蛇蛇着之即爛

簡誤

此行血散結之藥婦人月事不以時至審察未定者不可輕用瘀血病見之不審者勿試卷栢味辛甘溫平微寒無毒主五藏邪氣女子陰中寒熱痛癥瘕血閉絕子止欬逆治脫肛散淋結頭中風眩痿躄強陰益精久服輕身和顏色令人好容顏

疏○卷栢稟石之氣兼感天之陽氣以生故味辛溫別錄益之以甘平微寒無毒入足厥陰少陰血分藥也故主五臟邪氣女子陰中寒熱痛癥瘕血閉絕子又主痿躄強陰益精久服輕身和顏色當是理榮血之要藥行而能補者也別錄又謂止欬逆治脫肛散淋結頭中風眩其亦辛能散結辛能潤燥甘能緩中甘能益血之謂歟

簡誤

孕婦禁用

辟虺雷味苦大寒無毒主解百毒消痰祛大熱療頭痛辟瘟疫其狀如龕塊蒼朮節中有眼

疏○辟虺雷感天地陰寒之精其味苦氣大寒無毒故主解百毒消痰祛大熱療頭痛辟瘟疫豫章人專以此和諸草搗汁治疔瘡有神

藥王味甘平無毒解一切毒止鼻衄吐血祛煩

躁苗莖青色花黃色葉摘之有汁搗汁飲驗

疏○藥王稟天地清和生發之氣以生故其味甘平無毒甘能解毒故主解一切毒平能涼血清熱故止鼻衄吐血祛煩躁也

草犀根味辛平無毒主解諸藥毒嶺南及睦婺間如中毒草此藥及千金藤竝解之亦主蠱毒溪毒惡刺虎狼蟲虺等毒天行瘧瘴寒熱咳嗽痰壅飛尸喉閉瘡腫小兒寒熱丹毒中惡注忤

痢血等並煮汁服之其功用如犀故名草犀解毒為最

疏○草犀根得地之辛味感天之寒氣以生本草稱言平詳治療功能專主解諸藥毒亦主蠱毒溪毒惡刺虎狼蟲虺等毒天行瘧瘴寒熱咳嗽痰壅飛尸喉閉瘡腫小兒寒熱丹毒中惡疰忤痢血並煮汁服之其功用如犀故名草犀解毒為最生衢婺江饒間苗高

二三尺獨莖根如細辛研服更良生水中之名水犀也

百草花主百病長生神仙亦煮花汁釀酒服之異類云鳳剛者漁陽人也常採百花水漬封泥埋之百日煎為丸卒歿者內口中即活胡剛服藥百餘歲入地肺山列仙傳云堯時赤松子服之得仙

疏○百草花當取羣草中之芳烈者大都百

花必在春時春者天地發生萬物之氣也花者華也因得天地發生之和氣抽其精英而為花故主百病長生神仙亦煮花汁釀酒服管有採百花水漬泥封埋之百日煎為丸卒灰者內口中即活其功固可驗矣

已上三種一種唐本餘二種陳藏器餘已下却有旱藕石藥仙人草會州白藥陳思岌千里及鐵葛伏鷄子根陳家白藥龍珠

提胡根甜藤孟娘菜吉消草郎耶菜菁菜
聚養等功効雖多所立土地不一罕識難
致坊間無有故皆存而不論以俟後之博
物君子



